

# Johannes Flury nov president da la Pro Raetia

Radunanza da commembers a Soluturn


DA LUCAS DEPLAZES / ANR

■ **Suenter 13 onns ha demissionà il president Andreas von Sprecher. Ses successur è Johannes Flury. La dieta champestra da quest onn a Poschiavo s'occupa cun la trilinguitad dal Grischun.** La Pro Raetia è vegnida fundada l'onn 1949 da las uniuns grischunas en la Bassa. La finamira è stada da rimnar e d'activar las forzas grischunas ordaifer il chantun e ponderar co ch'ins pudess sustegnair ils interess da noss chantun. Quai è stà il temp gist suenter la Segunda guerra mundiala, ina situaziun economi-camain inscherta. Ins pledava dal «Sonderfall Graubünden» e da subvenziuns. La Pro Raetia è s'engaschada sin divers

secturs ed ha sustegnì plirs projects, saja quai sin il sector economic, cultural e social u en favur da l'ambient sco per exempel per la protecziun dal Lai da Segl. Ditg è vegnida considerada la Pro Raetia cun sias uniuns er sco ina sort «ambassadors» grischuns en la Bassa. La suprastanza funcziunava tenor il princip da «Vorort» e sa cumponeva mintgamai da Grischuns e Grischunas da Turitg, da Basilea, da Berna e.a.

## Midadas

Dentant ha quai dà grondas midadas. Il «Sonderfall» è emblidà. L'onn 1998 n'èsi betg pli stà pussaivel a la Pro Raetia da metter ensemen ina suprastanza en la Bassa. La bainstanza materiala da



Johannes Flury surpiglia a partir da l'onn proxim il presidi da la Pro Raetia. FOTOS L. DEPLAZES

**Lea Schneller-Theus, la gestiunaria, ed Andreas von Sprecher, il president abditgont.**



noss temp ha stgatschà in pau il spiert da s'engaschar voluntariamain per la cuminanza. Il secretariat da la Pro Raetia – e cun quai era las activitads – è vegnì transferì en il Grischun. Cumbain che la funcziun da la Pro Raetia è oz in'otra, è restada ina rolla impurtanta, numnadamain quella da metter a disposiziun ina plattafurma publica e neutrala per discurren problems actuals dal Grischun or da las differentas posiziuns.

En ses pled d'avertura ha il president *Andreas von Sprecher* constatà che quai saja oz difficil da definir ils interess da noss chantun. Ina opiniun comunabla davart ils problems e las schliaziuns n'è strusch pussaivla pli da formular. Dasper fiss urgenta la necessitad da sa metter d'accord davart las dumondas fundamentalas, sin tge moda e maniera po la populaziun grischuna subsister ils proxims onns.

En la medema crena dat er il vice-president e represchentant da las uniuns grischunas en la Bassa, *Not Janett*. En il rapport annual 2012 fa el attent

che la rolla da l'uniun saja sa midada. La Pro Raetia na veglia betg pli funcziunar sco uniun tetgala da las uniuns grischunas en la Bassa, mabain surpigliar plitost ina rolla integrativa e comunicativa.

## Signals fatals

*Johannes Flury*, che surpiglia il timun da la Pro Raetia a partir da l'onn proxim, ha sincerà ch'el haja grond plaschair da sia nova incumbensa. Il Grischun triling, ils chantuns muntagnards insomma, profiteschian d'in bonus da simpatia en la Bassa. En vista a las impurtantas decisiuns dal pievel ils ultims temps – abitaziuns secundaras, idioms e rumantsch grischun – hajan posiziuns cuntraversas e charplinas emess signals fatals envers la Bassa che pudessan periclitir quest bonus da simpatia e la prontadad da las aglomeraziuns da sa gidar. En quest senn vul tschentar Flury ils accents da la dieta champestra a Poschiavo sin la valita culturala da la trilinguitad dal Grischun e main sin ils problems da la scolaziun da las linguas.

## Suprastanza: mutaziuns

Johannes Flury è vegnì elegì sco nov president da la Pro Raetia gia l'onn passà a Berna. Avant che surpigliar il presidi vul el terminar sias lavurs da rectur a la Scuola auta da pedagogia a Cuir. Sco nov delegà a la Lia Rumantscha ha la radunanza elegì *Jon Carl Tall*, il presiden da l'Uniun dals Grischuns e da las Grischunas en la Bassa. *Martin Cantieni*, che ha represchentà la Lia, surpiglia autras incumbensas en la suprastanza.

*Lea Schneller-Theus*, la gestiunaria da la Pro Raetia, ha tegnì bain tgasa. Il quint serra cun in gudogn da passa 5000 francs, la contribuziun annuala resta sco fin quà. Da pensar dat la sminuaziun dal dumber da commembers. Quest è sa reducì ils ultims onns da passa 1000 sin actualmain 483.

Cun in cordial applaus ha la radunanza prendì cumià da ses parsura *Andreas von Sprecher* che ha timunà la Pro Raetia durant 13 onns cun respectabel engaschament, cun ses cumportament ruas-saivel ed amicabel e cun ses dun e spiert d'enclegentscha.